

四庫全書

經部

欽定四庫全書

儀禮集編卷二

龍里縣知縣盛世佐撰

士冠禮第一之二

筵于戶西南面

註曰筵主人之贊者戶西室戶西

教氏曰戶西即戶牖間也後皆放此戶西客位也筵于此者以其成人尊之此席東上

世佐案大夫士東房西室故以戶牖間為客位若室有東西房者則以牖前為客位皆取其近西也
詳見鄉飲酒禮

贊者洗于房中側酌醴加柶覆之面葉

註曰洗盥而洗爵者昏禮曰房中之洗在北堂直室東隅篚在洗東北面盥側酌者言無為之薦者面前也葉柶大端贊酌者賓尊不入房古文葉為攬

敖氏曰洗洗解也酌醴蓋西面也云側明無佐之酌

者凡贊者酌醴皆側也特於此見之

郝氏曰側特也特一酌無三醴也葉匙首寬薄如葉
張氏曰註引昏禮證房中別有洗非在庭之洗也側
酌者贊者自酌還自薦也柶類今茶匙葉即匙頭贊
者前其葉以授賓者欲賓得前其柄以授冠者冠者
得之乃前其葉以扱醴而祭也柶用時仰之贊者不
自用故覆之以授也

世佐案側偏也房中側謂房中之西偏也蓋房中

之洗直室東隅則其於房為西側也明矣經言此者著贊者洗解之處也側字句絕先儒以側酌醴為句而訓側為特宜其說愈多而愈支也又案昏禮醴使者及醴婦皆贊者自酌還自薦脯醢而不云側酌則註義紕矣凡贊者之酌未聞有佐之者何獨於是而云側乎教說亦不可通也

賓揖冠者就筵筵西南面賓受醴于戶東加柶面枋筵前北面

註曰戶東室戶東今文枋為柄

敖氏曰贊者出房西面賓由西序往故受醴于室戶東言面枋見其訝受也固加柶矣乃言之者見其更為之也

張氏曰致祝當在此時祝辭見後

世佐案訝受並受之辨見聘禮

冠者筵西拜受觶賓東面答拜

註曰筵西拜南面拜也賓還答拜于西序之位東面

者明成人與為禮異於答主人

張氏曰冠者拜訖進受解賓既授解乃復西序之位
答之賓答主人拜當西階北面此西序東面故註云
異於答主人

薦脯醢

註曰贊冠者也

教氏曰不言於席前可知也薦脯醢脯在西

冠者即筵坐左執解右祭脯醢以柶祭醴三興筵未坐

啐醴捷柶興降筵坐奠解拜執觶興賓答拜

註曰捷柶扱柶於醴中其拜皆如初

疏曰祭醴三者如昏禮始扱一祭又扱再祭也此啐醴不拜既爵者以其不卒爵故也

敖氏曰祭脯醢以脯祭擣醢而祭之既祭不言右執觶者可知也筵末席之西端也亦以柶兼諸觶乃坐啐醴建猶立也云建者上葉下枋與扱時異又以明其已入于觶則不復執之也降筵坐於筵西也不卒

爵故既啐則拜其意與拜既爵者同

世佐案祭祭先代始為飲食之人也必祭之者示
不忘本也啐嘗也嘗醴成賓意也不中席者明此
席所以行禮不主為飲也捷當作建字之譌也士
昏禮聘禮皆云建柶謂以柶插于醴中也插之蓋
下枋上葉不卒解者糟醴不可盡也

右醴冠者

朱子曰醴依下章註當
作禮謂以醴禮之也

冠者奠解于薦東降筵北面坐取脯降自西階適東壁

北面見于母

註曰薦東薦左凡奠爵將舉者於右不舉者於左適東壁者出闈門也時母在闈門之外婦人入廟由闈門

疏曰薦左據南面為正也闈門見雜記彼註云宮中之門曰闈門為相通者是也

敖氏曰籩豆而云薦者上經云薦脯醢故因其事而名之省文後皆放此必取脯者見其受賜也

郝氏曰降自西階父在不敢由阼也東壁廟東側室冠子則父主外事在東序母主內事在東壁子既冠入見也鄭註東壁為闈門外古廟在宅東由廟中入宅曰闈門果爾當云適西壁何為反適東壁乎有事于宗廟宜夫婦共親之豈父在廟母獨在宅乎非也母拜受子拜送母又拜

註曰婦人於丈夫雖其子猶挾拜

敖氏曰母於其子乃挾拜者重冠禮也凡婦人與丈

夫為禮其禮重者則俠拜

郝氏曰古者婦人肅拜少儀云婦人雖君賜肅拜肅拜者立拜也男子跪拜婦人立拜故古婦人與男子為禮必俠拜俠拜者婦人先一拜男子答拜婦人又一拜也

世佐案母先子拜先儒多疑之冠義云見於母母拜之見於兄弟兄弟拜之成人而與為禮也夫禮之而先拜於敵者則可於其子終嫌太重孔氏頴

達云廟中冠子以酒脯奠廟訖子持所奠酒脯見于母母拜其酒脯重從尊者處來故拜之非拜子也斯言得之觀見母以脯而見兄弟以下徒見也亦足以明之矣然則篇中無奠廟文何也曰冠者受醴於廟是即奠廟矣非必以其受薦之餘復薦之皇祖也母又拜何也曰此註所謂俠拜也教氏曰凡婦人與丈夫為禮禮重則俠拜受廟脯固重禮也

右冠者見于母

賓降直西序東面主人降復初位

敖氏曰初位阼階東直東序之位

冠者立于西階東南面賓字之冠者對

註曰對應也其辭未聞

疏曰未字先見母字訖乃見兄弟之等急於母緩於兄弟也

郝氏曰字以代名也辭見後

右字冠者

賓出主人送于廟門外

註曰不出外門將醴之

敖氏曰賓出而贊者不從以其當與冠者為禮也

張氏曰此下冠禮既成賓出就次以後諸事冠者見兄弟見贊者見姑姊為一節易服見君見鄉大夫先生為一節主人醴賓又一節凡三節

請醴賓賓禮辭許賓就次

註曰此醴當作禮次門外更衣處也以帷幕簟席為之

朱子曰醴冠者章言醴者皆指其物而言故註不改字此醴與醴冠者之醴同義故改之下章醴賓亦此義故不重出

敖氏曰請醴之辭則士昏記有之此禮雖與彼異辭宜略同醴之賓之禮壹獻有俎有幣似饗矣乃曰醴者亦因用醴而名之

右賓出就次

冠者見於兄弟兄弟再拜冠者答拜見贊者西面拜亦如之

註曰見贊者西面拜則見兄弟東面拜贊者後賓出疏曰亦如之者言贊者先拜而冠者答之也

從集說
節本

敖氏曰兄弟與贊者皆先拜之亦重冠禮也兄弟位在洗東贊者位在西方亦西當西序贊者為禮竟則亦出而就次此時兄弟之在廟者冠者皆見之乃不

見父者以難為禮也蓋此時冠者於凡所見者皆不
先拜而答拜乃其禮當然爾父至尊也是禮有不可
行故闕之且父為冠主雖不見之亦無嫌也不見賓
者賓既醴之則交拜矣是亦見也若復行禮則幾於
褻

世佐案敖氏論不見賓之故得之不見父者直以
父為冠主故耳自為主者冠畢自當見父

大戴禮
云太子

與庶子其冠
皆自為主

如謂至尊難為禮則君亦至尊也下

文有奠摯于君之禮矣何嫌乎又疏以為冠畢已見不言可知蓋皆不知禮意而遷就其說者

入見姑姊如見母

註曰入入寢門也廟在寢門外如見母者亦北面姑與姊亦俠拜也不見妹妹卑

世佐案姜氏云弟亦皆見見姊不見妹省文非也兄弟乃同姓之稱上文兄弟畢袵玄寧必冠者之兄弟哉不得援以為見妹之證敖氏謂未成人則

不與為禮得之

右冠者見兄弟贊者姑姊

乃易服服玄冠玄端爵韠奠摯見於君遂以摯見於鄉
大夫鄉先生

註曰易服不朝服者非朝事也摯雉也鄉先生鄉中
老人為卿大夫致仕者

疏曰鄉先生即鄉飲酒鄉射禮先生書傳所謂父師
也亦有士之少師鄭以經但言鄉大夫故略不言也

敖氏曰此玄端更言玄冠者別於冕之緇布冠也奠
贄見于君謂執贄至下奠也再拜稽首也見於君亦
玄端而不朝服者以其未仕也所見者亦玄端見之
鄉大夫鄉之異爵者也或曰鄉大夫即主治一鄉者
未知孰是先生德齒俱尊者也士相見禮曰士見於
大夫終辭其贄於其入也一拜其辱見於先生之禮
亦宜如之

顧氏炎武曰士之嫡子繼父者也故得奠贄見于君

庶子不得見君左傳昭公四年仲與公御菜書觀于公叔孫怒而逐之是也

張氏曰見君見鄉大夫先生非必是日因見兄弟等類言之耳

世佐案鄉大夫當以敖氏後說為正

右見于君及鄉大夫鄉先生

乃醴賓以壹獻之禮

註曰壹獻者主人獻賓而已即燕無亞獻者獻酢酬

賓主人各兩爵而禮成特牲少牢饋食之禮獻尸此其類也士禮一獻卿大夫三獻賓醴不用柶者沛其醴內則曰飲重醴稻醴清糟黍醴清糟梁醴清糟凡醴事質者用糟文者用清

疏曰此醴亦當為禮文不具也

朱子曰註不言改字說見上非不具也

張氏曰註引內則者明醴有清有糟前醴子用糟此醴賓其清者也

主人酬賓束帛儷皮

註曰飲賓客而從之以財貨曰酬所以申暢厚意也束帛十端也儷皮兩鹿皮也

敖氏曰此酬賓之禮當行於賓受獻之後未卒爵之前猶食禮既受侑幣乃卒食也

張氏曰酬賓大夫用束帛乘馬天子諸侯以玉將幣士束帛儷皮獻數多少不同其酬幣唯于奠酬之節一行之

贊者皆與贊冠者為介

註曰贊者衆賓也皆與亦飲酒為衆賓介賓之輔以贊為之尊之飲酒之禮賢者為賓其次為介

朱子曰贊者謂主人之贊者也恐字誤作衆賓耳

敖氏曰言此於酬賓之後者明酬幣惟用於正賓也介副也以副於正賓名之飲酒之禮有賓有介有衆賓此贊冠者為介其餘為衆賓也衆賓之位亦在堂鄉飲酒禮賓席于戶牖間介席于西序衆賓之席繼

賓而西

世佐案贊者蓋兼衆賓及主人之贊者言也衆賓即戒而不宿者既來觀禮亦有助主人成禮之意故云贊者註意如此非誤也但註言衆賓而不及主人之贊者為未備耳鄉飲酒記云主人之贊者西面北上不與無算爵然後與此宜亦如之

右醴賓

賓出主人送于外門外再拜歸賓俎

註曰一獻之禮有薦有俎其牲未聞使人歸諸賓家也

世佐案此俎蓋以乾肉載之冠子者不殺禮之正也不殺則不用鮮肉可知必歸之者俎肴之貴者與人飲食而歸其貴者厚之也

右送賓

朱子曰此章以上正禮已具以下皆禮之變

張氏曰以上士冠禮正經頗疑數事冠於廟重成人

也未冠不以告既冠不以見何也見於母而不見于父見贊者而不見賓疏以為冠畢已見似矣然醴畢即見于母儀節相承則見父見賓當於何時豈在酌醴定祥之前與又言歸俎而不言載俎其牲未聞註已陳之要昏文不具也

世佐案古人凡事稟命于禩矧冠昏重禮乎經不言者可也曲禮言取妻者齊戒以告鬼神而士昏禮亦不具即此例不見父與賓說見前非文不

具也

若不醴則醮用酒

註曰若不醴謂國有舊俗可行聖人用焉不改者也
曲禮曰君子行禮不求變俗祭祀之禮居喪之服哭
泣之位皆如其國之故謹脩其法而審行之是也酌
而無酬酢曰醮醴亦當為禮

疏曰自此以上說周禮冠子之法自此以下至取籩
脯以降如初說夏殷冠子之法

劉氏敬曰若不醴則醮用酒謂庶子也醴重醮輕昏
禮適婦醴之庶婦醮之丈夫之冠猶婦人之嫁則醮
用酒者必庶子也下文曰庶子冠于房外南面遂醮
焉是矣註云謂國有舊俗可行聖人用焉又註醮于
客位云夏殷禮也皆非也夏殷有天下千有餘歲冠
禮行之久矣設以醮為禮焉溥天之下皆醮也周公
何以改之然則醮于客位當曰醴于客位嫡子冠于
阼醴于客位以變為敬也庶子冠與醮相因不于阼

亦不于客位略庶子也醮禮繁醴禮簡以簡為貴也
醮三舉醴一辭以少為貴也醮用酒醴用醴以質為
貴也醮有折俎醴脯醢而已不尚味也酒在房外醴
在房中以變為敬也此皆聖人分別嫡庶異其儀也
朱子曰不醴而醮乃當時國俗不同有如此者如魯
衛之幕有縵布祔有離合皆周禮自不同未必夏殷
法也記註所云若以杞宋二代之後及他遠國未能
純用周禮者言之則或可通然亦未有明文可考也

此註又言改字者上下文異故須別出也

敖氏曰此醮與醴大意略同惟用酒而儀物繁為異上既見醴禮矣此復言不醴則醮者蓋冠禮之始惟醴而已然少近於質故後世聖人又為此醮禮與之並行焉言若者文質在人用之惟所欲耳

郝氏曰醮醮也盡飲之名醴一酌醮三酌加折俎盛者殺牲較醴多文矣凡禮先質而後文醴與醮皆歷世已行之跡若者隨時不定之辭若醴則用醴若醮

則用酒醴濁而酒清

張氏曰醴醢二法其異者醴側尊在房醢兩尊于房
戶之間醴用觶醢用爵醴篚從尊在房醢篚從洗在
庭醴待三加畢乃一舉醢每一加即一醢醴薦用脯
醢醢每醢皆用脯醢至三醢又有乾肉折俎醴贊冠
者酌授賓賓不親酌醢則賓自降取爵升酌酒醴者
每加入房易服出房立待賓命醢則每醢訖立筵西
待賓命醴者每加冠必祝醴時又有醴辭醢者加冠

時不祝至醮時有醮辭其餘儀節並不異也

姜氏曰此若不醴及下文若殺皆禮之變用酒禮盛于醴殺牲禮盛于脯醢折俎而冠禮不以盛禮先之者聖人于始冠示以淳古之意即始加用緇布冠之意也其又及于用酒殺牲者則權也夫拜下改為拜上聖人雖違衆而不從其泰若麻冕改純則聖人亦以無害于禮而從之若不醴若殺意亦如此若如疏者之說則夏尚忠商尚質而反謂其文勝于周也豈

理之所可通哉

世佐案衆說不同當以朱子為正凡禮皆由質而趨于文疏以醴之質者為周禮醴之文者為夏殷禮倒矣宜後儒莫之從也劉氏知疏說之非而其自為說亦未善如以此節為醴庶子經當云若庶子則醴用酒而下文亦不應別見庶子冠法矣朱子謂庶子一醴以酒安得有若此及下文殺牲之盛禮哉蓋冠禮之初惟醴而已庶子則一醴以酒

所謂醴重而醢輕也

醴重醢輕鄭註曾子問語

若三醢殺牲乃

後人為以此以尊異適子而庶子不敢干焉然非聖人之意矣聖人之所以分適庶者以質為貴以變為敬二語盡之貴繁貴多固非制禮者之意而貴簡貴少又非變禮者之意也教氏知冠禮始惟有醴後乃為醢所見最卓而以醢為聖人所制則惑也此特叔世變禮之後國俗有此不同記者以其無甚害于禮而存之猶夫子從純之意耳豈真聖

人所制哉姜說實本朱子然亦不能堅守其說而遷就之至以用酒殺牲為聖人之權蓋見此節列于經文之內不敢斷然以為變禮不得不曲為回護而其辭屈矣是皆不知此篇經記混淆之所致也竊謂此篇之經至歸賓俎而止矣自此以下皆記也凡為記者有三有記經所未備者有記禮之變異者

變以時代言異以國俗言

有各記所聞頗與經義相違

者記經所未備者周公之徒為之與經並行者也

記禮之變異則非周之盛時之書矣蓋自巡守禮廢天子不能申變禮易樂之討而異政殊俗者出焉其在春秋之際乎至于各記所聞而頗失經意者則七十子後學所記也意其初經與記分記與記亦不相雜至漢儒掇拾灰燼之餘竄以經師之說而三者之辨不可復知且有經連于記記混于經者錯亂無次于記為甚讀者不可不分別觀之也何以明自此以下之為記也試以昏禮較之此

若不醴及下文若殺猶昏禮記若不親迎也所謂
記禮之變異也若孤子若庶子及冠者母不在猶
昏禮記庶婦及宗子無父之類所謂記經未備也
諸辭則昏禮俱屬記尤為明證唯屨制一節朱子
移附陳器服節之末或是彼處脫簡然詳其文體
亦似昏禮記摯不用死腊必用鮮之類經蓋以屨
賤不與冠服並言而記者詳之亦是記所未備也
自冠義以下乃漢儒取戴記家語以成文觀其中

載孔子之言而篇末又雜出老氏之意其非本記之舊明矣首以冠義二字題之若小戴記篇目然十七篇無此例也作者原不敢自附于本經之記而編禮者誤以記之一字加之若移彼記字于此節之首則得矣此非愚之創見也朱子謂醴賓節以上正禮已具以下皆禮之變固已微示其意矣張氏未嘗見通解亦謂送賓歸俎以上士冠禮正經似與朱子有暗合者愚故推明之以自附于竊

取之意云

尊于房戶之間兩甔有禁玄酒在西加勺南枋

註曰房戶間者房西室戶東也禁承尊之器也名之
為禁者因為酒戒也玄酒新水也雖今不用猶設之
不忘古也

敖氏曰兩甔一酒一玄酒也玄酒在西尊西上也尊
西上者以冠者之位在其西故順之他篇不見者其
義皆放此加勺加於二尊之上而覆之也玄尊亦加

勺者不以無用待之也南枋為酌者北面覆手執之便也

郝氏曰水曰玄酒玄水色

洗有篚在西南順

註曰洗庭洗當東榮南北以堂深篚亦以盛勺解陳於洗西南順北為上也

敖氏曰醮而設洗之節亦與醴同惟有篚為異此見其異者耳篚以盛爵也下篚之爵三

始加醮用脯醢賓降取爵于篚辭降如初卒洗升酌

註曰始加者言一加一醮也加冠於東序醮之於戶

西同耳始醮亦薦脯醢賓降者爵在庭酒在堂將自

酌也辭降如初如將冠時降盥辭主人降也凡薦出

自東房

朱子曰始加二字乃疊見前始加緇布冠一章之禮

醮用脯醢乃題下事其實賓客拜後乃薦之也賓升

酌時冠者猶在出房南面之位

教氏曰贊者筵于戶西賓乃降也用爵醮禮文也卒洗亦當壹揖壹讓乃升

世佐案此章于其儀文之與醴同者每云如初則醴在先而醮為後起益可見矣

冠者拜受賓答拜如初

註曰贊者筵于戶西賓升揖冠者就筵乃酌冠者南面拜受賓授爵東面答拜如醴禮也於賓答拜贊者則亦薦之

張氏曰賓亦筵前北面釋醮辭訖冠者乃南面拜受冠者升筵坐左執爵右祭脯醢祭酒興筵末坐啐酒降筵拜賓答拜冠者奠爵于薦東立于筵西

註曰冠者立俟賓命賓揖之則就東序之筵

朱子曰此正醮禮也下兩醮及後章三醮凡言如初者皆謂如此禮也

張氏曰降筵奠爵而後拜執爵興賓乃答拜拜訖冠者乃奠爵薦東其節亦與醴同註云就東序之筵謂

當更加皮弁也

徹薦爵筵尊不徹

註曰徹薦與爵者辟後加也不徹筵尊三加可相因由便也

敖氏曰徹之亦贊冠者也每醮禮畢必徹薦爵者所以新後醮之禮若不相因然徹薦爵蓋入于房加皮弁如初儀再醮攝酒其他皆如初

註曰攝猶整也整酒謂撓之

朱子曰此如初儀者如前再加一章之儀也下條放此再醮攝酒其他皆如初言唯攝酒異於始醮其他皆如之也

張氏曰撓謂更益整頓之示新也

加爵弁如初儀三醮有乾肉折俎齊之其他如初

註曰乾肉牲體之脯也折其體以為俎齊嘗之

疏曰周禮腊人鄭註云大物解肆乾之謂之乾肉若今梁州鳥翅矣薄析曰脯槌之而施薑桂曰股脩若

然乾肉與脯脩別言之今梁州鳥翅者或為豚解而七體以乾之謂之乾肉及用之將升于俎則節析為二十一體故總名乾肉折俎也

陳氏祥道曰肱骨三肩臂臑也股骨三肱胛也脊骨三正脊脰脊橫脊也脅骨三代脅正脅短脅也正脅之前則臑也肱之上則髀也然則左右肱之肩臂臑與左右股之肱胛而為十有二脊骨三與左右脅骨六而為九二穀正祭不薦於神尸主人之俎兩

髀不升於主人主婦之俎膾不升於吉祭之俎則祭
之所用者去髀膾而二十有一去二齧而為十九矣
國語曰禘郊之事則有全胥王公立飫有房胥親戚
燕飲有穀胥則全胥豚解也房胥體解也穀胥骨折
也士喪禮將豚四髻去蹄兩胎脊既夕鼎實羊左脾
亦如之然則四髻者殊左右肩髀而為四又兩胎一
脊而為七此所謂豚解也若夫正祭則天子諸侯有
豚解體解禮運曰腥其俎熟其穀體其犬豕牛羊腥

其俎謂豚解而腥之為七體熟其穀謂解之爛之為二十一體是也大夫士有體解無豚解以其無朝踐獻腥之禮故也

朱子曰豚解之義陳說得之二十一體則折脊為三曰正脊曰脰脊曰橫脊兩胛各三曰代脅曰長脅曰短脅凡六兩肱各三曰肩曰臂曰臑凡六兩股各三曰股曰肫曰胠凡六通為二十一體凡牲與腊方解割時皆是如此但牲則兩髀以賤而不升於正俎耳

故少牢禮具列自髀以下凡二十一體但髀不升耳而鄭氏註云凡牲體之數備於此初不及他體也况此言脂則又不殊賤也而周禮內饗及此經昏禮兩疏皆言二十一體乃不數兩髀而不計其數之不足蓋其疎略至少牢疏及陳祥道乃去髀而以兩轂足之蓋是此經後篇猶有脰及兩轂可以充數然欲盡取之則又行其一故獨取兩轂而謂脰非正體若果如此則轂亦非正體又何為而取之耶此其為說雖

巧而近於穿鑿不可承用又曰初儀見上三醮唯攝酒及有乾肉折俎齊之為異其它皆如始醮也

敖氏曰俎設於脯醢之南士虞禮曰有乾肉折俎二尹縮祭半尹此乾肉亦縮俎而左胸右末其所齊即祭半尹者也亦振祭乃齊之唯言齊省文耳物至齒謂之齊知其味謂之嘗

世佐案折俎折牲體載于俎也用乾肉者不殺故也

北面取脯見于母

敖氏曰著此者見其與醴同也下放此

右醮

若殺則特豚載合升離肺實于鼎設扁鼎

註曰特豚一豚也凡牲皆用左胖煮於鑊曰亨在鼎
曰升在俎曰載載合升者明亨與載皆合左右胖離
割也割肺者使可祭也可濟也

疏曰升載之法載在後升在前今先言載後言升又

合字在載升之間者通言之欲見在俎在鑊俱曰合也鼎者以茅覆鼎長則束其本短則編其中肩牛鼎大肩長三尺腳鼎小肩長二尺皆依漢禮而知今此豚鼎當用小肩也周禮少牢特牲鄉飲鄉射皆用右胖唯虞禮喪祭反吉故用左此云用左胖或據夏殷之法也凡肺有二種一者舉肺一者祭肺就舉肺之中復有三稱一名舉肺為食而舉二名離肺少儀云三牲之肺離而不提心也三名齊肺以齒齊之此三

者皆據生人為食而有也就祭肺之中亦復有三稱
一者謂之祭肺為祭先而有之二者謂之忔肺切之
使斷三者謂之切肺名雖與忔肺異實則同也三者
皆為祭而有

朱子曰忔亦作判疑
即切字寫誤為二耳

陳氏曰豚則吉凶皆合升用成牲則升其胖而去髀
吉升右而凶升左脊脅六而肱股五為十一體也

敖氏曰載行文士喪禮曰特豚四鬣去蹄兩朮脊此
其合升之體數也肺離之者使絕之而為祭也既祭

則濟之故又名濟肺其與脊同舉者則謂之舉肺鼎
設局是亦舉之也孤子則舉鼎陳于門外此不陳惟
俟時而入錯于阼階前也

郝氏曰肺即豕肺周人尚肺火德勝金祭食先肺局
鉉也鼎兩旁有鉉反向上以木橫貫蓋上而舉之且
以壓制鼎蓋如門之局竈竈通密閉也

張氏曰案特牲少牢及鄉飲酒皆用右胖此合升左
右胖或以嘉禮故異之與註云凡牲皆用左胖疏以

為鄭據夏殷之法未知然否

世佐案殺牲而醮又醮禮之異者也每變而益侈
其去聖人尚質之意遠矣言合于載升之間見其
合升于鼎而載之也句法與公食大夫禮云蓋執
豆相似教以載為衍字非載于俎亦合者唯為冠
者一人設也人多則折又案註左胖之左恐是右
字之譌

始醮如初

註曰亦薦脯醢徹薦爵筵尊不徹矣

朱子曰初謂前章之始醮也

再醮兩豆葵菹羸醢兩籩栗脯

註曰羸醢虺蜃醢今文羸為蝮

疏曰案鄭註周禮醢人云細切為齋全物若牒為菹
作醢及鸞者先膊乾其肉乃後莖之雜以梁麴及鹽
漬以美酒塗置甑中百日則成矣是作醢及菹之法
也

熊氏曰羸註謂螭螭案方言燕趙間以為蜘蛛韻書
以為蝸牛蜘蛛蝸牛非可食者疏引爾雅為証彼爾
雅乃訓詁之儒集經註以為書者或疑內則有蝸醢
恐是螭螭蝸牛之謂然內則之蝸乃力戈切集韻古
螺字作蝸韻釋云蚌屬也非蝸牛之蝸矣陸佃直謂
蝸牛可醢蓋為禮註所誤爾羸即螺字亦作蝸韻書
以為香螺也

朱子曰再醢唯攝酒加籩豆為異不言如初者可知

也

敖氏曰兩豆兩籩之位若以有俎之禮言之則醢在
道東栗在道西脯在栗南也此薦雖不與三醢有俎
者相因而位則亦放之與

郝氏曰羸蛤屬圓者為羸剉而漬之以酒為醢
三醢攝酒如再醢加俎齊之皆如初齊肺

註曰攝酒如再醢則再醢亦攝之矣加俎齊之齊當
為祭字之誤也祭俎如初如祭脯醢

疏曰祭先之法祭乃齋之又不宜有二齋故註破加
俎之齋為祭也

朱子曰初謂上章之始醮也上章及此三醮兩節但
皆攝酒齋俎為異而其它皆如初則祭已在其中矣
故註於上章三醮初不改字於此蓋誤改之疏又妄
為之說皆非也但上章之俎無肺而此有肺故又特
言所齋者肺而不嫌於複出則此齋字從本文為是
陸氏亦云齋讀如字齋肺釋上齋之為齋肺也凡言

之法多此類

敖氏曰攝酒如再醮此與不殺之禮互言也加俎者謂於籩豆之外又加豚俎也設之當道醢之南三加後者彌尊故三醮而後者愈盛禮宜相稱也濟之謂絕祭濟之不言祭者亦文省肺之濟者必祭祭者不必濟也皆如初謂此再醮三醮之所不見者皆如不殺始醮之禮也云濟肺者又明其所濟之異於不殺者也不殺則祭用乾肉而濟之

張氏曰加俎者不徹豆籩而加設此牲俎也其祭亦止祭俎肺不復祭脯醢

世佐案上章云徹薦爵筵尊不徹謂每醮之籩豆與爵皆如其舊而更之惟筵尊仍舊也此章云如初則豆籩之加者亦徹而更設可知加俎之義當如教說張誤

卒醮取籩脯以降如初

教氏曰籩脯謂其在籩者也言此以別於所祭者耳

右殺牲而醮

若孤子則父兄戒宿

註曰父兄諸父諸兄

敖氏曰孤子雖尊於家然未冠則不可與成人為禮於外故戒宿賓客則諸父若兄為之惟言父兄戒宿則筮日筮賓為期之事皆將冠者自主之可知

冠之日主人紛而迎賓拜揖讓立于序端皆如冠主禮于阼

註曰冠主冠者親父若宗兄也古文紒為結今文禮作醴

楊氏曰父在時冠於東序醴於戶西此則冠於東序三加訖又改筵受醴於東序也

敖氏曰孤子未冠而於此乃行成人之禮者無父則得伸其尊也諸父若兄不主其事者家無二主也必立于序端者因冠主之位也禮謂賓與冠者行禮也蓋指三加與醴之類而言行禮皆於阼亦見其異於

父在者以其為主人故也然則若醮若醴皆因冠席
為之與

張氏曰有父加冠則將冠者紛而候于房中孤子則
紛而迎賓拜揖讓立皆如為子加冠之主人有父加
冠則醴于室戶西孤子則醴于阼此其異也

世佐案惟言紛則不采衣可知記曰孤子當室冠
衣不純采是也禮當從今文作醴謂以醴禮冠者
也教說非父在者冠于阼醴于戶西此特記其與

彼異者耳三加于阼不待言也疏云言禮則兼醴
醮二法亦非也古者唯醴而已又案註云冠主冠
者親父若宗兄蓋謂冠主之中兼斯二者父在父
為主父没宗兄為主家統于一尊也然則孤子冠
而自為主人其唯宗子與

凡拜北面于阼階上賓亦北面于西階上答拜

敖氏曰此賓主相拜之正位也

張氏曰父在加冠受醴戶西拜于筵西南面賓答拜

于序端東面此則與賓各專階北面也

若殺則舉鼎陳於門外直東塾北面

註曰孤子得申禮盛之父在有鼎不陳于門外

疏曰凡陳鼎在外者賓客之禮也在內者私家之禮也是在外者為盛也

敖氏曰直東塾當其南也鼎陳於此亦俟時而入錯之大夫士陳鼎於門外皆北面惟喪奠乃西面耳國君陳鼎南面天子未聞

世佐案此又記孤子冠之變禮

右孤子冠

世佐案曾子問父沒而冠則已冠掃地而祭于禩已祭而見伯父叔父而后饗冠者可補此節之闕若庶子則冠于房外南面遂醮焉

註曰房外謂尊東也不于阼階非代也不醮于客位成而不尊

疏曰周之庶子宜依適子用一醮夏殷庶子亦依三

醮三代適子有祝辭若庶子則無故下文註云凡醮者不祝

朱子曰疏說恐非蓋一醮以酒者正也其用醴與三

醮為適而加耳

世佐案三醮是後世所加

庶子則皆一醮以酒足

矣

世佐案庶子冠無廢禮

楊氏日記云適子冠于阼以著代也庶子不於阼而冠于房外南面非代故也記云醮于客位加有成也是適子於客位成而尊之此則成而不尊故因冠之

處遂醮焉

敖氏曰言遂者見其因冠席也冠醮同處可以不必別布席此言庶子指父在者也父在而冠宜別於適父沒則其禮同矣

世佐案庶子之冠之異于適者唯此三事耳冠位不於東序一也禮之用酒而不用醴二也醮于冠位而不別布席三也其他皆如之下註云凡醮者不祝謂三醮耳非指庶子而言疏引之誤又案此

不別言庶子之父存沒見其禮皆如是也教氏謂父沒與適子同非蓋庶子父沒則宗子為冠主昏禮云支子則稱其宗是其例矣焉得同

右庶子冠

冠者母不在則使人受脯于西階下

疏曰內則云舅沒則姑老若死當云沒不得云不在且母死則不得使人受脯今言不在者或歸寧或疾病也使人受脯為母生在於後見之也

朱子曰經云不在恐兼存沒而言若彼出而嫁亦是也蓋主人若非宗子則固有無主婦者此云使人未必母使之也又昏禮使者授人脯之後又執以反命則此使人受脯之後亦必更有禮節但文不具不可考耳

右母不在

戒賓曰某有子某將加布於其首願吾子之教之也
註曰吾子相親之辭吾我也子男子之美稱

疏曰上某主人名下某子之名布緇布冠也教之者以加冠行禮為教之也

從集說
節本

敖氏曰冠禮三加乃惟云布者取其始加而質者言之謙也又以士昏禮例之此以下所載諸辭皆當為記文乃在經後記前亦未詳

世佐案諸辭之當為記敖氏已見及之特狃于漢儒所定本而未能斷耳且不知是篇之記之混于經者固不止此也

賓對曰某不敏恐不能共事以病吾子敢辭

註曰病猶辱也

主人曰某猶願吾子之終教之也賓對曰吾子重有命
某敢不從

註曰敢不從許之辭

宿曰某將加布於某之首吾子將莅之敢宿賓對曰某
敢不夙興

註曰莅臨也

敖氏曰正賓而下其宿之之辭皆同惟以主人之親宿與否別之耳

始加祝曰令月吉日始加元服

註曰令吉皆善也元首也

朱子曰諸辭皆當以古音讀之其韻乃叶

棄爾幼志順爾成德壽考惟祺介爾景福

註曰祺祥也介景皆大也因冠而戒且勸之女如是則有壽考之祥大女之大福也

朱子曰順古與慎通用

敖氏曰棄爾幼志戒之也慎爾成德勉之也言先去幼志而後能慎成德也幼志即傳所謂童心成德成人之德

張氏曰冠義云即冠將責以父子君臣長幼之禮即所謂成德也祝以有是德即有是福是勸之也

再加曰吉月令辰乃申爾服

註曰辰子丑也申重也

敬爾威儀淑慎爾德眉壽萬年永受胡福

註曰胡猶遐也遠也

教氏曰有威而可畏謂之威有儀而可象謂之儀德者得也行道而有得於心之謂德者內也威儀者外也學者固當以德為先威儀為後然不重其外亦未必能保其中之所有者也故此先言敬威儀乃後言慎德淑善也眉壽豪眉也人年老必有豪眉秀出者世佐案民受天地之中以生是以動作威儀之則

威儀云者聲音笑貌云乎哉容貌顏色曾子所謂
道動容周旋中禮孟子所謂盛德蓋有諸中必形
諸外制乎外所以養其中而敬之一字則又合內
外徹始終者也冠子之時而即以是勗之可謂知
要矣

三加曰以歲之正以月之令咸加爾服

註曰正猶善也咸皆也皆加女之三服謂緇布冠皮
弁爵弁也

兄弟具在以成厥德

敖氏曰厥者指兄弟而言能成兄弟之德則正身齊家之事也以此勉之其所以責成人之道也深矣
張氏曰言成此冠禮是成其德也

世佐案厥指冠者言也敖說非

黃者無疆受天之慶

註曰黃黃髮也者凍梨也皆壽徵也疆竟

疏曰凍梨面如凍梨之色也

張氏曰首三句為一聯服叶德慶叶疆音羌正令二句又自相叶

醴辭曰甘醴惟厚嘉薦令芳

註曰嘉善也善薦謂脯醢芳香也

敖氏曰醴言厚見其未泐

拜受祭之以定爾祥承天之休壽考不忘

註曰休美也不忘長有令名

張氏曰定祥承休與易凝命之旨相類天人之理微

見於此

醮辭曰旨酒既清嘉薦亶時

註曰亶誠也

始加元服兄弟具來孝友時格永乃保之

註曰善父母為孝善兄弟為友時是也格至也永長也保安也行此乃能保之凡醮者不祝

敖氏曰保守而有之也言女方加元服而兄弟皆來者蓋女孝友之德有以感格之也然自今以後當常

保守此德而勿失之美而復戒之也一加則一醮故每醮之辭輒見加冠之序以明其各有所為而不嫌與祝辭同也經於醮禮始加無異文於再加三加皆云如初儀乃見醮禮則是醮者亦祝明矣醮禮文故以多儀為貴

張氏曰孝友時格孝友極其至也教以盡孝友之道乃可長保之也註凡醮者不祝謂用酒以醮者每加冠畢但用醮辭醮之其方加冠時不用祝辭也詳醮

詞始加元服等句與祝辭相類兼用之則複矣疏以
為醮庶子不用祝辭錯會註意來力之反與時之叶
世佐案張說得之保之者謂保其元服也孝弟為
仁之本士庶人不仁不保四體始醮而言及于此
其所以詔之者切矣又案醮而不祝唯適子三醮
者耳庶子一醮每加仍有祝辭其醮辭亦與此異
大抵如醴辭而易其首句與

再醮曰旨酒既滑嘉薦伊脯

註曰湑清也伊惟也

敖氏曰獨言脯者欲協音耳亦但舉其所上者言也
凡一籩一豆則先脯後醢

乃申爾服禮儀有序祭此嘉爵承天之祐

註曰祐福也

敖氏曰序謂始加再加之次第

三醑曰旨酒令芳籩豆有楚

註曰旨美也楚陳列之貌

疏曰用再醮之籩豆不增改之故云有楚

世佐案每醮籩豆皆更易之疏誤

咸加爾服肴升折俎

敖氏曰肴謂乾肉若豚也詩曰爾殽伊脯

承天之慶受福無疆

張氏曰亦兩句叶

世佐案醮辭後世變禮者所撰視醴辭加多矣然
推本孝友猶有古訓之遺則焉記者所以取之與

字辭曰禮儀既備令月吉日昭告爾字爰字孔嘉

註曰昭明也爰於也孔甚也

髦士攸宜宜之于假

註曰髦俊也攸所也于猶為也假大也宜之是為大矣

朱子曰假恐與嘏同福也註說非是

敖氏曰假通典作嘏今從之髦士才德過人之稱言髦士乃與嘉字相宜若宜之則為嘏矣

永受保之曰伯某甫仲叔季唯其所當

註曰伯仲叔季長幼之稱甫是丈夫之美稱孔子為尼甫周大夫有嘉甫宋大夫有孔甫是其類甫字或作父

疏曰某甫者若云尼甫嘉甫也伯仲叔季若兄弟四人則依次稱之夏殷質則積仲周文則積叔若管叔蔡叔是也殷質二十造字之時便兼伯仲叔季稱之周文造字時未呼伯仲至五十乃加而呼之故檀弓

云幼名冠字五十以伯仲周道也若孔子始冠但字

尼甫至年五十乃稱仲尼是也

從通解
節本

朱子曰案檀弓孔疏云人年二十冠而加字如曰伯某甫者年至五十者艾轉尊則又舍其某字而直以伯仲別之與此賈疏不同疑孔說是

王氏應麟曰二十為字未呼伯仲至五十乃加呼之此儀禮賈疏也二十已有伯某甫仲叔季雖云伯仲皆配某甫而言至五十直呼伯仲此禮記孔疏也朱

文公曰疑孔疏是石林

葉夢得號

謂五十為大夫去某甫

言伯仲而冠以字如南仲榮叔南季之類然仲山甫尹吉甫皆卿士亦以字為重

張氏曰此辭賓直西序東面與子為字時命之也據釋文備與日叶為一韻字音滋嘉叶居之反為一韻假叶音古與甫為一韻顧炎武云備與字一韻嘉與宜一韻假與甫一韻古人文字錯綜不必二句一韻也

右辭

郝氏曰祝辭雜用詩語多後人補撰

世佐案諸辭唯醮辭後人擬作其餘皆周公制作
時所定未必周公自作蓋祝雍史佚輩承旨為之
使天下後世皆遵而用之大戴禮公冠云成王
冠周公使祝雍祝王曰達而弗多也是其徵矣

屨夏用葛玄端黑屨青絢縹純純博寸

註曰屨者順裳色玄端黑屨以玄裳為正也絢之言

拘也以為行戒狀如刀衣鼻在屨頭總縫中紉也純
緣也三者皆青博廣也

疏曰屨順裳色者禮之通例衣與冠同屨與裳同也
縫中紉謂相接之處縫中有條紉也緣謂繞口緣邊
也約純亦以條為之博寸謂純之廣也

從集說
節本

敖氏曰約取屈中之義而名之綴於屨頭以為飾也
張氏曰此下言三服之屨不與上服同陳者屨賤故
別言之夏葛屨冬皮屨春秋熟則從夏寒則從冬此

玄端黑履初加時所用

素積白屨以魁拊之緇約纒純純博寸

註曰魁蜃蛤拊注也

疏曰魁即蜃蛤一物也煨為炭灰用之拊注謂塗注於上使色白也

郝氏曰魁頭也拊跗同底也即士喪禮綦結于跗之跗以魁跗之謂以頭為底如今鞞頭反底向上也

張氏曰此皮弁服之屨再加時所用

世佐案魁拊教以為皆未詳今且依註疏之說
爵弁黻履黑絢纁純純博寸

註曰爵弁履以黑為飾爵弁尊其履飾以纁次

疏曰案冬官畫纁之事云青與白相次赤與黑相次
玄與黃相次鄭云此言畫纁六色所象及布采之第
次纁以為衣又云青與赤謂之文赤與白謂之章白
與黑謂之黼黑與青謂之黻鄭云此言刺繡采所用
繡以為裳此是對方為纁次比方為繡次案鄭註履

人云複下曰舄禪下曰屨又註云凡舄之飾如績之次凡屨之飾如繡之次也者即上黑屨以青為紵縹純白屨以黑為紵縹純則白與黑黑與青為繡次之事也今次爵弁纁屨纁南方之色赤不以西方白為紵縹純而以北方黑為紵縹純者取對方績次為飾舉舄者尊爵弁是祭服故飾與舄同也

朱子曰三屨經不言所陳處註疏亦無明文疑亦在房中故既加冠而適房改服即得弁易屨而出也但

不知的在何處疑服既北上則或各在其裳之南也
敖氏曰此見屨者或言衣或言裳或言冠錯綜以為
文也先卑而後尊以三加之次言之也三屨陳之蓋
在其裳之西

張氏曰此三加所用之屨

世佐案朱子云屨在裳南者據經服北上言也敖
氏云在裳西者據經服東領言也蓋服既東領則
裳與帶鞞以次而西屨當在其末敖說近是北上

三服之次也

冬皮履可也

疏曰冬時寒許用皮故云可也

敖氏曰皮履不見其色與飾同於上可知上言夏此言冬則是周之禮四時皆可冠矣

不履總履

註曰總履喪履也縷不灰治曰總

疏曰喪服記云總衰四升有半總衰既喪服明總履

亦是喪屨言此者欲見大功未可以冠子恐人以冠子故於屨末因禁之也

敖氏曰不屨之屨著屨之稱也總乃布之疏者以之為屨則輕涼也言此者嫌夏時冠或得用之總非吉布而冠則嘉禮之重者是以不宜屨此屨若燕居則或屨之可

世佐案註以總屨為喪屨疏云言此者見大功未可以冠子故于屨末禁之殆非今以喪服考之斬

衰菅屨又公士大夫之衆臣為其君繩屨齊衰疏
屨不杖麻屨此喪屨之見于經者也齊衰三月與
大功同繩屨總衰與小功以下同吉屨無約此喪
屨之見于記及註疏者也五服之屨如斯而已不
見有所謂總屨者註特以總是衰布意之耳未可
信也又曾子問云如將冠子而未及期旦而有齊
衰大功小功之喪則因喪服而冠雜記云以喪冠
者雖三年之喪可也謂大功未可冠子者禁其吉

冠不禁其喪冠也屨喪屨是喪冠矣又何禁焉且大功合著繩屨非總屨也蓋凡布之細而疏者即謂之總漢時南陽有鄧總以造此布得名此布之用蓋不止為衰也教說似得之矣或曰總屨總衰之屨也總衰之屨與吉同但無紃耳紃是屨頭之飾古以為行戒恐後人或不辨其有無而屨之故言此以禁之未知是否

考三禮圖童子服黑屨無紃青總純則無紃之

屨未冠者著之既冠則以此為喪屨而不復著矣

右屨

世佐案朱子移此附陳器服章教氏從之今考其
文亦記體也故仍其舊

記

疏曰凡言記者皆是記經不備兼記經外遠古之言
鄭註燕禮云後世衰微幽厲尤甚禮樂之書稍稍廢
棄蓋自爾之後有記乎又案喪服記子夏為之作傳
不應自造還自解之記當在子夏之前孔子時未知

定誰所錄

熊氏曰儀禮是經禮記是傳儒者恒言之以冠義昏義鄉飲酒義射義燕義聘義與儀禮士冠士昏鄉飲酒射燕聘之禮相為經傳也劉氏又補士相見公食大夫二義以為二經之傳及讀儀禮則士冠禮自記冠義以後即冠禮之記矣士昏禮自記士昏禮凡行事以後即昏禮之記矣鄉飲酒自記鄉朝服謀賓介以後即鄉飲之記矣鄉射禮自記大夫與公士為賓

以後即鄉射之記矣燕禮自記燕朝服於寢以後即
燕禮之記矣聘禮自記久無事則聘以後即聘禮之
記矣公食大夫禮自記不宿戒以後即公食大夫之
記矣覲禮自記几俟於東廂以後即覲禮之記矣士
虞禮自記虞沐浴不櫛以後即士虞禮之記矣特牲
饋食禮自記特牲以後即特牲之記矣士喪禮則士
處適寢以後附在既夕者即士喪禮之記矣既夕禮
則啟之昕以後即既夕之記矣漢儒稱既夕禮即士

喪禮下篇故二記合為一也喪服一篇每章有子夏作傳而記公子為其母以後又別為喪服之記其記文亦有傳是子夏以前有此記矣十七篇惟士相見大射少牢饋食有司徹四篇不言記其有記者十有三篇然冠禮之記有孔子曰其文與郊特牲所記冠義正同其餘諸篇惟既夕之記略見於喪大記之首章喪服之傳與大傳中數與與疑當作語相似餘記自與小戴冠昏等六義不同何二戴不以禮經所有之記

文而傳之也十三篇之後各有記必出於孔子之後
子夏之前蓋孔子定禮而門人記之故子夏為作喪
服傳而并其記亦作傳焉

世佐案諸記不出一手亦非一代所成其別有三
說已見前疏所謂作于幽厲之後者特其一耳若
其翼經而行者自有此禮以來不可一日而闕寧
待後世而具乎子夏所傳亦其最先出者此篇記
有孔子曰乃漢儒所錄未可執是而謂十三篇之

記盡出於孔子之後子夏之前也據漢書藝文志
所載諸記與經文各自為書本不相雜以記附于
逐篇之下者其始于鄭氏乎鄭氏註易合彖象于
經見魏志博士
淳于俊語亦其例也朱子又以記文分繫于
逐節之左亦欲學者尋省易了今不從之者恐亂
經文也竊取朱子周易本義之意云

冠義

朱子曰此篇之末本有記一章今考之皆見於家語

邾隱公篇而彼詳此略故今於此刪去而取彼文修潤以附冠義

張氏曰此記已有孔子曰當在孔子後不知定誰所錄冠義又記中小目餘篇不復言其義者或欲舉一例餘也又戴記亦有冠義又後儒所為故與此異也世佐案自此已下與郊特牲所記冠義正同非本經之記也其體裁自別讀者詳之

始冠緇布之冠也太古冠布齊則緇之其緜也孔子曰

吾未之聞也冠而敝之可也

註曰太古唐虞以上綏纓飾未之聞太古質無飾重古始冠冠其齊冠白布冠今之喪冠是也

疏曰太古冠布者謂著白布冠也云齊則緇之者將祭而齊則為緇以鬼神尚幽闇也云其綏也孔子曰吾未之聞也者孔子時有綏者故非之諸侯則得著綏故玉藻云緇布冠績綏諸侯之冠也云冠而敝之可也者據士以上冠時用之冠訖則敝之不復著也

若庶人猶著之故詩云彼都人士臺笠緇撮是用緇布冠籠其髮是庶人常服之矣鄭云白布冠者今之喪冠是也者以其太古時吉凶同服白布冠未有喪冠三代有牟追之等則以白布冠為喪冠若然喪服起自夏禹以下也

敖氏曰其綏也孔子曰吾未之聞者謂太古之時冠但有纓未聞其綏也綏者以纓之餘長為飾者也古者之纓足以固冠則已未知為飾後世若或用古冠

亦宜存古意若綏之則失之矣王藻曰緇布冠續綏諸侯之冠也此其夫子之所非者與冠謂始加之後也敝猶毀壞也敝之猶可則不復用可知既不復用則亦何必以綏為飾乎

張氏曰記者以經有緇布冠皮弁爵弁玄冠四等之冠各記其所從來與古今因革之異此節記緇布冠為太古齊冠本無綏又始冠加以以存古意加後不復更著也

適子冠於阼以著代也

敖氏曰著明也著代明其代父也

世佐案阼謂東序少北西面也阼是主人之位適子將為父後故冠之於此庶子不代父則於房外南面矣

醮於客位加有成也

敖氏曰加猶尚也尊也有成謂有成人之道也尊其有成故以客禮待之

張氏曰加有成加禮于有成德者也

世佐案是說本家語王肅註

姜氏曰客位謂戶西也加嘉同適子冠于阼醴于戶西醴用酒亦如之若庶子則冠于房戶外因醴焉凡以嘉之也

世佐案此亦承上適子而言古者適子醴而已不曰醴而曰醴則此記之作于後人也益可見矣客位非子所宜居也而醴之於此者以其有成人之德而加尊之若庶子則因其所冠之位而醴焉是

雖有成而不加尊也

三加彌尊諭其志也

教氏曰凡人之志皆欲自卑而尊故三加之禮其最尊者在後蓋諭其志而然也諭謂深曉之彌益也

張氏曰諭其志教諭之使其志存修德每進而上也
世佐案張說得之

冠而字之敬其名也

註曰名者質所受于父母冠成人益文故敬之

張氏曰敬其名敬其所受于父母之名非君父之前不以呼也皆冠義之大者故記者釋之

委貌周道也章甫殷道也毋追夏后氏之道也

註曰或謂委貌為玄冠委猶安也言所以安正容貌章明也殷質言以表明丈夫也甫或為父今文為斧毋發聲也追猶堆也夏后氏質以其形名之三冠皆所常服以行道也其制之異同未之聞

張氏曰此因冠者冠畢易服玄冠故記之道猶制也

言三代冠制此其同等者也

周弁殷冔夏收

註曰弁名出于槃槃大也言所以自光大也冔名出于
于懶懶覆也言所以自覆飾也

敖氏曰弁爵弁也冔收與弁同稱是亦弁之類也
張氏曰此因三加爵弁而記其制之相等者

三王共皮弁素積

註曰質不變

教氏曰記言此於爵弁之下者欲令異者以類相從
然後言同者耳蓋文法宜然

張氏曰言三代再加所同用也疑委貌以下節當在
適子節之前與首節皆言冠制當以類從

無大夫冠禮而有其昏禮古者五十而后爵何大夫冠
禮之有

註曰據時有未冠而命為大夫者周之初禮年未五
十而有賢才者試以大夫之事猶服士服行士禮二

十而冠急成人也五十乃爵重官人也大夫或時改娶有昏禮是也

敖氏曰無大夫冠禮而有其昏禮據禮經而言也其下二句所以釋無大夫冠禮之意也古者謂始有冠禮之時也五十而爵者以其年艾德盛乃可服官政也後世雖未必五十而后爵然亦不至於未冠而為大夫故作記之時去古雖遠而猶不別立大夫冠禮也

張氏曰自此至未皆明士冠禮可以上達之故此言
大夫無冠禮如有未冠而為大夫者其冠亦從乎士
而已

世佐案自此以下即劉歆所謂倉等推士禮而致
于天子之說也古者謂殷以前耳非周初也喪服
殤小功章云大夫為昆弟之長殤此周公之書也
身為大夫其兄乃有未冠而殤者則年未二十而
為大夫者有矣如謂試為大夫而仍士禮則為昆

弟之長殤當服大功不得降而為小功也降而為小功則已爵也又案大夫以上本無冠禮而玉藻記天子諸侯始冠之冠家語記成王冠頌及公侯冠禮左傳載魯襄公冠事國語載趙文子冠事然則諸侯冠禮始于夏末天子冠禮始于周初大夫冠禮其始于周之季世乎孔穎達謂此記直云諸侯不云天子又下云天子之元子猶與士同則天子冠禮由來已久但無文以明之此臆說也家語

言天子冠禮而直以成王之事實之且曰此周公之制也足徵其所自起矣惟其先有諸侯冠禮而後有天子冠禮故大戴禮公冠篇公冠今本作公符云天子擬焉歸有光作天子諸侯無冠禮論乃訾之殆未之深考與

公侯之有冠禮也夏之末造也

註曰造作也自夏初以上諸侯雖父死子繼年未滿五十者亦服士服行士禮五十乃命也至其衰末上

下相亂篡弒所由生故作公侯冠禮以正君臣也

張氏曰此言不獨大夫無冠禮雖公侯冠禮亦夏末始作非古也據註訓造為作則末字當一讀近徐師曾解郊特牲云末造猶言末世則二字連讀制作義在末造之外讀者酌之

世佐案夏之末造也句法與檀弓魯禮之末失也相似皆當於末字一讀徐說非

天子之元子猶士也天下無生而貴者也

註曰元子世子也無生而貴皆由下升

張氏曰天子之元子猶用士禮又不但公侯已也

繼世以立諸侯象賢也

註曰象法也為子孫能法先祖之賢故使之繼世也
張氏曰諸侯繼世而立疑其生而貴矣實以其象賢
乃立之天子元子亦以象賢乃享天位均非生而貴
者也故其冠皆用士禮也

以官爵人德之殺也

註曰殺猶衰也德大者爵以大官德小者爵以小官
張氏曰凡以官位爵人皆以德為等殺爵以待有德
安得有生而貴者乎

死而謚今也古者生無爵死無謚

註曰今謂周衰記之時也古謂殷殷士生不為爵死
不為謚周制以士為爵死猶不為謚耳下大夫也今
記之時士死則謚之非也謚之由魯莊公始也

朱子曰此於冠義無所當疑錯簡也然疏義亦非是

此蓋老子不尚賢貴因任之意言上古之時民各推其賢者奉以為君沒則復奉其子以繼之其後遂以為諸侯然其子之立也但象似其賢而已非故擇賢而立之也至於中古乃在上者擇人任官而為之爵等此則德之衰殺不及上古之時矣文至于周而有謚法則生而有爵者死又加謚此則又其殺也上古民自立君故生無爵中古未有謚法故雖有爵而無謚又以申言古今之變也

世佐案天下無生而貴者也繼世以立諸侯象賢也此三句即禮運天下為公選賢與能之意謂古者不家天下雖儲君必有著德乃貴不以世及為禮雖繼世必能法祖乃立是皆非生而貴者故其冠皆用士禮以官爵人以下與上文似不相屬詳味之蓋亦申言用士禮之故也孔氏之疏郊特牲也有曰四十強而仕亦應無士冠禮而云士有冠禮者士是有識之目故立禮悉用士為正所以王

等並依士禮冠子也是說也可取以釋此焉天下
既無生而貴者則自天子之元子以至於士皆庶
民耳何以行士禮也士固非貴者也殷以前之士
有官而無爵周制始以其官而爵之此則德之衰
矣然猶未有謚也士死而為之謚自周衰始也古
者生不予爵死不予謚士固非貴者也故其禮可
通于上下或難之曰死而謚以下註固以士言之
矣殺是等殺之殺而予以衰殺解之何也曰此本

之朱子也或曰朱子之解具在而子所為說又似不與之盡同何也曰朱子解自繼世以立諸侯以下別為一義與上文絕不相屬以其為錯簡也竊疑此與郊特牲文同不應兩處皆屬錯簡象賢二字見書微子之命亦指古者天子命諸侯而言非民自立君之謂彼雖出於今文當得二字之本義且象賢者謂能象法前人之賢非僅象似而已也釋經亦求其是而已問之心而不敢以為安故稍

易之而不辭其妄耳至于記所陳世道升降之故
愚以為與禮運相似禮運固先儒所謂有老氏意
者亦猶遵朱子之說也或又曰然則以官爵人德
之殺也之說可得詳與曰古者年未五十而有賢
才者使之試守其官而不授之以爵必待其功德
昭著而後爵之是爵人者不以其官也諸侯大夫
皆然其終身有官而無爵者士也後世以世及為
禮懼其上下相亂君賤則不足以鎮撫之于是幼

而嗣位者勢不得不爵之以杜篡弑之源此以官爵人之法所由肇也大夫未五十而爵自諸侯而例之也士之有爵又自諸侯大夫之例而推之也而究其原則皆自弭亂始所以為德之殺或曰官與爵異乎曰說命曰官罔及私昵惟其能爵罔及惡德惟其賢未嘗一之也單言之義可相兼仲虺之誥曰德懋懋官是也對舉之則官是使之試守爵是謂命之王制曰論定然後官之任官然後爵

之是也

楊氏曰儀禮所存者惟士冠禮自士以上有大夫諸侯天子冠禮見於家語冠頌大戴公冠與禮記特牲玉藻者雖遺文斷缺不全而大槩亦可考如趙文子冠則大夫禮也魯襄公邾隱公冠則諸侯禮也周成王冠則天子禮也大夫無冠禮古者五十而後爵何大夫冠禮之有其冠也則服士服行士禮而已始冠緇布冠自諸侯下達諸侯始加緇布冠續緜緇布冠有緜尊

者飾也

其服玄端再加皮弁三加玄冕

大戴公冠四加玄冕鄭註四當

為三冕則三加鄭說為是唯天子三加其衮冕與

朱先生曰案本文但言玄端皮弁玄冕則三加鄭說為是唯天子三加其衮冕與

天子始

冠加玄冠朱組纓

玉藻云玄冠朱組纓天子之冠也鄭氏曰始冠之冠也玄冠委貌

再加皮弁

三王共皮弁素積疏曰此條論第二所加之冠自天子達於士以其質素故三王

同之無所改易也

三加衮冕

見上文

又君冠必以裸享之禮行

之以金石之樂節之

以鐘磬為之節

以先君之祧處之

諸侯以始

祖之廟為祧

又諸侯醴賓以三獻之禮其酬賓則束帛乘

馬其詳見於儀禮經傳通解

郝氏曰古無大夫冠禮亦附會之說禮所以獨有士者禮莫不始于士也明乎士禮而大夫以上可引而伸之加其等益其數天子諸侯皆可知矣今謂五十為大夫故無大夫冠禮天子諸侯未聞必五十而後為其亦無冠禮又何也玉藻云玄冠朱組纓天子之冠緇布冠纁綌諸侯之冠大戴記云諸侯冠禮四加玄冕春秋傳云公冠用裸享之禮行之金石之樂節之此禮謂皆起于夏末乎焉知士冠之獨始于古也

古有士即有大夫有士冠即有大夫冠而諸侯天子所損益可知也

徐氏師曾曰古者天子諸侯十二而冠與大夫皆用士禮故儀禮無天子諸侯大夫之冠禮非逸也設不幸天子崩太子未冠則冕而踐阼不行冠禮已奉宗統君天下不可復責以成人之道也故家語孔子曰古者王世子雖幼其即位則尊為人君人君治成人之事者何冠之有又曰君薨而世子主喪是亦冠也

所謂因喪而冠也蓋世子未命于天子故不言即位而言主喪周氏不考於禮乃謂元子世子不當用士禮而引玉藻公符左傳冠頌以補之殊不知玉藻公符左傳所云皆後世之失成王冠頌如誠有之意者周公欲王修德故因仍夏末之禮而使祝雍作頌以勗之爾安可取以補儀禮之逸乎

世佐案大小戴記家語左傳國語諸書及此篇之記所論天子諸侯大夫冠禮之有無何其殊也有

謂天子諸侯即位已冠無冠禮者冠頌云古者王世子雖幼其即位則尊為人君人君治成人之事者何冠之有又云君薨而世子主喪是亦冠也已

人君無所殊也是也

有援此以證大夫者鄭註喪服云大夫無殤服疏云已為

大夫則冠矣大夫冠而不為殤朱子云得為大夫之時已治成人之事如家語所說人君之例有

謂天子之元子諸侯之世子其冠與士禮同者冠頌云邾隱公既即位將冠使大夫因孟懿子問禮于孔子孔子曰其禮如世子之冠雖天子之元子

猶士也其禮無變天下無生而貴者也故此記亦云天子之元子猶士是也有謂諸侯大夫因喪而冠後不改冠者曾子問云天子賜諸侯大夫冕弁服于太廟歸設奠服賜服于斯乎有冠醮無冠醮註云不醮明不為改冠然則此諸侯大夫亦因喪而冠者疏乃謂其幼弱未冠總角從事至當冠之年因朝天子非是也有謂諸侯大夫年未五十猶服士服行士禮至五十乃命所以無冠禮者此記與郊特牲所云是也此皆論其無者之据也言天子冠者

冠頌記冠成王之頌公冠云天子儼焉玉藻記天子之冠是也言諸侯王太子庶子之冠與士異者冠頌記公冠則以卿為賓至其酬幣于賓則束帛乘馬等儀節又云王太子庶子之冠儼焉公冠篇略同及左傳季武子之說玉藻記諸侯之冠是也言大夫冠者國語云晉趙文子冠是也此則論其有者也或一禮而異議或一篇而異詞覽者幾茫乎不知所從矣然其說蓋各有指焉未可是彼而

非此也夏以前諸侯無冠禮周以前天子無冠禮
春秋以前大夫無冠禮凡言無者皆推本古義以
見世代之升降而其中有二說焉即位已冠為繼
世者言之也五十乃命為崛起者言之也至于除
喪不改冠者為其先已冠訖特與吉冠不同耳今
亦略見于雜記記云既冠于次入
哭踊者三乃出非無其禮也夫
自天子諸侯之冠禮既作必有成書以著其詳中
更去籍滅學之變而亡之故本經不能具要其大

節目之所在未嘗不以士禮為準而其中四加三
獻之類則亦尊卑隆殺之所由辨也見謂同者不
盡同見謂異者不盡異自天子以至諸侯之世子
其冠禮大略可覩矣惟大夫之冠僅一見于國語
而其禮不得聞記者殆以其衰世之制而略之與
諸書纂述不一手聞見各異辭而采摭于漢儒者
久往往錯亂附益于其間所以初讀之若紛紜而
莫可詰務條析而會通之庶犇然其各有當也執

一說而盡廢其餘豈通論哉



儀禮集編卷二